


# **TEZAU LITURGIC**

## **4 OCTOMBRIE**

# **SLUJBA SOBORULUI SF.KAZANULUI**



**MOSCOVA, 2000**



# Месяца октября в 4-й день Служба Собору Казанских святых

## На малой вечерни

На Господи, возвах: стихиры, глас 6:

Дивны путие Промысла Господня, иже явиша в земли Казанской угодников святых веры Христовы прежде просвещения ея: святителей преславных, таже святых мучеников, и прочих святых, Христа исповедавших.

Воспоим, людие, Спасу нашему Богу, иже благоволи крещением святым землю Казанскую просветити, таже святых проповедников веры, святителей Гурия и Варсонофия купно с Германом первых учителей земли сей явити. Христова просвещения плод красен приносит земля Казанская: святые мученики и исповедники, еще же преподобные отцы, иже страданиями и слезами Господу Иисусу Христу души своя молитвенно возложиша.

Слава, глас 8:

Да почтется святых собор в земли Казанстей просиявших: святителей Христовых, исповедников, преподобных и праведных, да будет изрядно среди них воспет святой

священномученик Ермоген, Патриарх  
Российский преславно явльниися.

И ныне, глас тойже:  
Владычице, приими молитвы раб Твоих и  
избави ны от всякия нужды и печали.

На стиховне стихиры, глас 2.

Подобен: Доме Евфрафов:

Богосвещенныя ныне земли Казанския  
святии вси, о людех Российских молитву  
сотворите.

Стих: Честна пред Господом смерть  
преподобных Его.

Грады же и веси отечества нашего и всех  
живущих в них заступлением вашим от бед  
избавите, молимся.

Стих: Блажен муж, бояйся Господа, в заповедех  
Его восхощет зело.

Во дни, егда страждет от бури и нестроения  
земля Российская, помощники нам, святии вси,  
будите.

Слава: глас 6:

Борими многажды грехом, да присно будем  
возстающе святою помощию и заступлением  
вашим, святии вси светлыя ныне земли  
Казанския.

И ныне: Богородице, Ты еси лоза истинная:

### Тропарь, глас 3:

Красуйся светло, земле Казанская, память Собора Святых Твоих совершаючи: первых проповедник Слова — святителей преславных, таже святых мученик, исповедник и чудотворец, еще же преподобных и праведных, иже купно в славе вечной предстояще, молятся Христу Богу и Заступнице Усердной спастися людем Своим.

### **На велицей вечерни**

Блажен муж: 1-й антифон.

На Господи, возвах: стихиры, глас 8:

Приидите, российстии собори, воспоим  
Содетелю нашему Богу, икону Казанскую  
Заступницы Усердныя нам явльшему, многия  
святые, в дар честный нам даровавшего.  
Приидите, российстии людие, восхвалим земли  
Казанския первые просветители, предивная  
Гурия и Варсонофия, таже преславного  
Германа, семена Христова учения в земли сей  
насадившия и люди многия к свету Христова  
Евангелия приведшия.  
Приидите, чада церковная, подивимся, како  
израсте в земли сей великий святитель и  
мученик, Ермоген, Патриарх Российский,  
первый приявший на длани свои икону  
Казанскую Пречистыя Богоотроковицы, таже

явление сие Богоматери и первыя просветители земли тоя в песнях церковных возвеличивший. Приидите, вернии, познаем силу любви Христовы, юже святии мученицы восприяша, заступницы наши, святии чудотворцы Иоанн, Петр и Стефан, иже сладкое имя Христово исповедаша и от присных своих горькую смерть прияша.

Слава, глас 4:

Да прославится днесь Собор святых, в земли Казанской Богу угодивших: славнии святители и просветители, таже священномученицы и исповедницы, кровь свою за Христа изливший, еще же преподобнии и праведнии, именованныи и неименованныи, покровом Матере Божия, Заступницы Усердныя в земли сей утвержденных.

И ныне, глас тойже:

Иже Тебе ради Богоотец пророк Давид:

Пророчества Исаиина чтение

Также глаголет Господь: вси языцы собращася вкупе, и соберутся князи от них. Кто возвестит сия в них? Или, яже от начала, кто слышана сотворит вам? Да приведут свидетели своя, и оправдятся, и да услышат, и да рекут истину. Будите Ми свидетели, и Аз Свидетель, глаголет Господь Бог, и отрок, егоже избрах. Да познаете,



и веруете Ми, и разумеете, яко Аз есмь, прежде Мене не бысть ин бог, и по Мне не будет. Аз есмь Бог, и несть, разве Мене, спасаяй. Аз возвестих и спасох, уничижих, и не бе в вас чуждий. Вы Мне свидетели, и Аз Господь Бог, и еще от начала Аз есмь, и несть от рук Моих избавляяй. Сотворю, и кто отвратит то? Сице глаголет Господь Бог, избавляяй вас, Святой Израилев.

### Премудрости Соломоновы чтение

Праведных души в руце Божией, и не прикоснется их мука. Непщевани быша во очесех безумных умерети, и вменися озлобление исход их. И еже от нас шествие — сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

## Премудрости Соломоновы чтение

Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение Свое и вооружит тварь в месть врагом. Облечется в броня правды и возложит шлем — суд нелицемерен. Приимет щит непобедимый — преподобие, поострит же напрасный гнев во оружие, споборет же с ним мир на безумных. Пойдут праволучныя стрелы молниины и, яко от благокругла лука облаков, на намерение полетят, и от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навыкните, судии концев земли, внушите, держащая множества и гордящаяся о народах язык. Яко дана есть от Господа держава вам и сила от Вышняго.

На литии стихира, глас 6:

Воззовем со благодарением Промыслителю нашему Богу, извольшему люди восточныя, крайния отечества нашего, святым крещением



просветити, многая святые проповедники и исповедники в тех возставить, также люди российские на подвиг ратный "встречь солнца" управити. Господи, слава святому смотрению Твоему!

Слава, глас 8:

Егда темный сей край восточный земли наша просветится, тогда многая святые явил еси, Боже наш, славу Церкви Твоея возвещающих.  
Господи, слава Тебе.

И ныне, Богородичен.

На стиховне стихиры, глас 8:

Припадем с любовью к преславному святителем Господним Гурию, Варсонофию и Герману, первым просветителям земли Казанския, также воспоим пречудного Ермогена, святителя-исповедника и Патриарха Российскаго.

Стих: Честна пред Господом смерть преподобных Его.

Помолимся усердно страстотерпцем Казанским, святым мучеником Иоанну, Стефану и Петру, имя Христово дерзновенно исповедавшим, также воспоим собор страдалец Христовых со Иаковом, Борисом и Феодором, души своя за Христа положивших и заступники наша усердные явльшихся.

Стих: Блажен муж, бояйся Господа, в заповедех

Его восхощет зело.

Воспоим и почудимся подвигом же, слезам и молитвам, яже преподобнии отцы Казанстии со преславными Ионою и Нектарием Богу принесоша, таже плод духовный многовековый в земли сей возрастиша.

Слава, глас 6:

Собор святых земли Казанския вопиет усердно ко Господу, да сохранит и избавит Спас мира Христос народ православный, во всех концах державы Российстей, молитву о спасении приносящих.

И ныне, Богородичен: Богородице, ты еси лоза истинная:

### На утрени

На Бог Господь: тропарь Собора Казанских святых, дважды.

Слава, и ныне, Богородичен.

По первом стихословии седален, глас 6:

Собор святых земли Казанския Богу предстоит, о людех скорбящих усердно молитву возсылающий.

Слава, и ныне, Богородичен:  
Богородице, Мати Божия, носило света неизреченного, помощь Твоею люди

скорбящая Твоя снабдевати не престай, Дево Пресвятая.

По втором стихословии седален, глас 6:  
Память святых, в земли Казанской просиявших, совершающе, людие, возвеселимся, крепкия сия помощники стяжавше.

Слава, и ныне, Богородичен:  
Людей Твоих мольбы прими, Пречистая Мати Божия, и от всякаго злаго обстояния избави.

По полиелеи величание:  
Величаем вас, святии вси, в земли Казанстей просиявшии, и чтим святую память вашу, вы бо молитесь о нас Христа Бога нашего.

По полиелеи седален. глас 1:  
В чертозах небесных Владыки нашего славно сияюще, Соборе святых Казанских, братий твоих земных не остави.

Слава, и ныне, Богородичен:  
Недугов и всяких болезней да избавлени будем заступлением Твоим, Пречистая Мати, селение и слава небесная.

По 50-м псалме стихира, глас 6:  
Соберемся, людие, милостивое смотрение Божие восславить, изволил бо Господь наш землю

Казанскую просветити; темже подвижников Христовых прославим: святителей чудных, исповедников, преподобных, праведных и всех святых, край сей освятивших помощию Господа нашего и благодатию Его.

Канон Богородице со ирмосом на 6.  
Таже всем святым, в земли Казанстей  
просиявшим, глас 8.

### Песнь 1

Ирмос: Воду прошел яко сушу и Египетскаго зла избежав, израильтянин вопияше: избавителю и Богу нашему поим.

Припев: Все святы, в земли Казанской  
просиявшии, молитесь Бога о нас.

Святити вси, иже землю Казанскую прежде ея просвещения именем Христовым освятиша, святителие Христовы и исповедницы, ихже достойно исчислити не можем, молитву вашу сотворите о братьях ваших страждущих, молим вы.

Первый просветителю Казанский, Гурие преславне, многу печаль и тяготу в юности твоей понесл еси, все упование на Бога возложь, добринок сотворился еси, путь бо твой духовный управи Господь.

Повелением царевым в Казань пришед, великий

проповедник веры Христовы явился еси, святителю Гурие, многия неверныя ко Христу обратил еси, чудесы преславными веру сих укрепляяй.

Богородичен: Аще и горение велие града Казани яви нам зрак Лица Твоего, Дево Пречистая, обаче Заступница Усердная земли наша явилася еси, Мати Божия, христиан похвало.

### Песнь 3

Ирмос: Ты еси утверждение притекающих к Тебе, Господи, Ты еси свет омраченных и поет Тя дух мой.

Святии исповедницы земли Казанския, прежде просвещения и по просвещении ея, кровь свою за Христа излившии, молитесь о нас недостойных дерзновение о вере Христове чрез все житие наше сохранить.

Святителю преславный Варсонофие, первый просветителю града Казани, в младem возрасте твоem горький плен понесый, монах предивный по избытии того явился еси, таже отцем иноков содеявсЯ, моли спастися унылым душам нашим. Святителю Варсонофие преподобне, первый устроитель жития монашескаго во граде Казани быв, красну обитель Спасова Преображения воздвигл еси, наставник быв чадом твоим, в законех жизни духовныя преславно светил еси .

Богородичен: Сокрытый в земли образ Твой,  
Дево Пречистая, Заступнице Усердная, по  
явлении Лица Твоего многая чудеса преславная  
и утешения духовная обильно источает  
страждущим рабом Твоим.

Седален, глас 5:

Исповедников имене Христова, прежде  
просвещения земли Казанския и по  
просвещении ея, святых всех возвеличим:  
святителей Гурия, Варсонофия, Германа,  
Ефрема и Епифания преславных, святых  
мучеников Авраамия, Иоанна, Петра, Стефана,  
Феодора, Бориса, Иакова, Сильвана и яже с  
ними, души своя за Христа положивших, таже  
преподобных Иону и Нектария с Гавриилом,  
вкупе пред престолом Божиим предстоящих, и  
всех святых, подвиги своя в земли Казанской  
совершивших и за ны Богу молящихся.

Слава, и ныне, Богородичен:  
Деву Пречистую, Матерь Христа Бога  
возвеличим, Собора святых в роде нашем  
память соблюдающую.

Песнь 4

Ирмос: Ты моя крепость, Господи, Ты моя и  
сила, Ты мой Бог, Ты мое радование, не оставль  
недра отча и нашу нищету посетив, тем с



пророком Аввакумом зову Ти: силе Твоей слава, человеколюбие.

Край Казанский солию учения Христова просветил еси, святителю Германе, таже во граде Свияжске обитель Богоматери создав, добр учитель явился еси, святе.

Книжному учению навик, инок добр от юности твоея явился, еще же друг и собеседник Максима преподобнаго быв, на пути иночеством укреплялся еси, преподобне Германе преславне. Престол Казанский по святем Гурии наследовав, добр пастырь и просветитель людям новым явился еси, святе Германе премудре, таже храмы Божия в земли Казанской умножив, на высшее служение восхищен был еси.

Богородичен: Образ Твой Преславный восхотев дати людям новопросвещенным, Заступнице Усердная, волю Свою чистей отроковице открыла еси, тем же Тя славим, Мати Богоневестная.

## Песнь 5

Ирмос: Вскую мя отринул еси от лица Твоего, свете незаходимый, и покрыла мя есть чуждая тьма окаяннаго, но обрати мя, и к свету заповедей Твоих пути моя направи, молюся.

Икону являющуюся Пресвятыя Богородицы Заступницы Усердныя на длани своя приял еси,

святителю Ермогене, первое же пение молебное пред нею сотворил еси, темже тя ублажаем, преславне.

Был еси, святителю Ермогене досточудне, первоиерарх Церкви Российской, таже залог спасения ея и всего отечества, егда брань тяжкая постиже Российскую землю, первый положил еси молитвы, слезы и прощения твоя, от врагов сию избавляли.

Явился еси предстатель наш и всего отечества православного, егда страдания тяжкая и смерть горькую приял еси, священноисповедниче Ермогене прехвальне, темже в чертозах небесных вселился еси, святе.

Богородичен: Знамение спасения явилася еси, Богомати Пречистая, егда иконою Твоею святою, яко Заступница Усердная, людям православным победу даровала еси, полки же иноземныя рассеяла еси.

## Песнь 6

Ирмос: Молитву пролию ко Господу и Тому возведу печали моя, яко зол душа моя исполнися и живот мой аду приближися и молюся, яко Иона, от тли, Боже, возведи мя. Святити вси земли Казанския, яко звезды пресветлыя в странах востока просиявшия, людям новым, в Церкви Христове упасшимся,

покров свой и защиту явите.

Молим вы, святителие Христовы Казанския страны: Ефреме и Епифание, да вашими святыми молитвами подаст Господь миру умирение.

Молим вы, Соборе святых земли Казанския, святым образом Матери Божией, Заступницы Усердной осиянныя, людей отечества вашего предстательством своим не оставите.

Богородичен: Егда возсия от земли Казанския святая икона Твоя, Владычице, тогда вси людие возвеселишася, помощницу Божию в скорбех своих обретше.

### Кондак, глас 3:

Веселитесь, людие, и възиграйте, память всех святых земли Казанския совершающе, тии бо молят прилежно Спасителя нашего Бога и Заступницу Усердную спастися рабом Своим.

### Икос:

Соберитесь, людие, в храм пресветлый Заступницы Усердныя, идеже купно со святыми, в земли Казанстей явльшимися, молит Пресвятая Владычица Сына Своего спастися недостойным рабом Своим.

## Песнь 7

Ирмос: В начале землю основавый и небеса  
Словом утвердивый, благословен еси во веки,  
Господи Боже отец наших.

Прежде просвещения земли Казанския ты,  
святой мучениче Иоанне, свет пресветлый  
явился еси, Христа Сына Божия исповедав и  
кровь Твою честную за Того пролил еси, братию  
твою, люди Российския, в вере Христове  
укрепляя.

Сладкое имя Христово призывал еси, святой  
мучениче Петре, ближняя твоя приглашая имя  
сие исповедати и Троице Святей поклониться.  
Темже пострадав, помощь твою нам источаеши,  
святые мучениче Петре блаженне.

Ты, преславный мучениче Стефане, Христа  
возлюбив и исцеление недугов прием, даже до  
конца верен Тому пребыл еси, от  
соотечественник твоих раздробляем; темже  
помощник верный людем Христовым явился  
еси, святые.

Святии мученицы: Борисе, Иакове, Феодоре,  
Василие и прочии страстотерпцы Казанстии, вы  
веле дерзновение в вере Христове явили есте,  
темже и чудотворцы преславнии людем своим  
соделаетесь.

Богородичен: Мати Божия Пречистая, образ  
Свой, яко дар пресвят земли Казанской давая

и тем многих исповедников Сына и Бога Твоего укрепившая, Заступнице Усердная, люди Твоя не остави

## Песнь 8

Ирмос: На горе святей прославляшася и в купине огнем Приснодевы Моисеови тайну являшаго, Господа пойте и превозносите во вся веки.

Молитвами вашими, преподобнии отцы Ионо и Нектарие, землю Кзанскую новопросвещенную освятиста и погребена близ наставника вашего святителя Гурия, нетление обретоста, темже братьй ваших заступлением своим не оставляйте.

Подвижники земли Казанския, преподобнии Ефреме и Епифание преславнии, подвиги вашими к Богу въздоста, ты же, преподобне Гаврииле, Седмиезерская похвало, молитвенник изрядный явися и помощник в скорбех людем твоим.

Преподобнии отцы наши и матери, подвиги вашими землю Казанскую осиявшии, ихже имена изочтени у Бога суть, подвижницы древнии, таже и дней новых молитву усердную о братьях ваших, спасения ищущих, Богу сотворите.

Богородичен: Мати Божия, Пречистая, ты не точию землю Казанскую святою иконою Твоею просвещаеши, но и всей державе Российстей в скорбех и ратных нахождениях Заступница Усердная являеши; темже Тя верно почитаем.

## Песнь 9

Ирмос: Проявленное на горе Законоположнику во огни и купине рождество Приснодевы, в наше верных спасение, песнями немолчными величаем.

Воздадим хвалу Богу, восточныя пределы земли нашея святым крещением просветившему, темже многия святые помощники и покровители, в стране Казанстей нам возставившему.

Вси святии земли Казанския, угодницы Божии, Духа Святаго сосуди честнии бывше, благодать Божественную восприяте, непрестанно молитесь о воспевающих и чтущих святую память вашу. Честныя бисеры Христовы, славныя страдальцы воспоим, иже землю Казанскую кровью своими освятивша и помощницы теплии в скорбех наших явишася.

Иже во времена прежняя и новая, святии вси: преподобнии и праведнии, ихже имена суть нам знаема и незнаема, Собор святых земли Казанския, Господу нашему о людех скорбных



молитву вашу теплую излейте.

Богородичен: Всему отечеству нашему вменися честная икона Твоя, Владычице Богородице, всю землю Российскую любовью Твоею озарявши, Заступнице Усердная, темже и к жизни духовней, в Бозе сокровенней, люди Твоя недостойныя устрояеши.

Светилен:

Красуйся, земле наша, светом Христовым просвещенная и Собор святых явившая: святителей и проповедников; мучеников, преподобных и праведных, тепле молящихся о роде своем, людех Российских, пред Богом ходящих.

Слава:

Ликует ныне Церковь Казанская о прославлении новомучеников своих, в тяжкия дни гонения от безбожной власти за Христа пострадавших: священномучеников Кирилла, Амвросия, Димитрия, Филарета, преподобномучеников Сергия, Лаврентия, Серафима, и иже с ними во обители Зилантовой убиенных, таже Иосифа, Сергия, Антония, Варлаама, Иова и Петра, в пустыни Раифской кровью своею землю нашу освятивших и молящихся пред Богом за нас недостойных.

И ныне, Богородичен:  
Радуйся, Радосте наша, Заступнице Усердная,  
иконою Твоею верная просвещающая и путь  
спасения вечного людям Твоим дарующая.

На хвалитех стихиры, глас 2.

Подобен: ДOME Евфрафов:

Да воспоемся усердно Собор Святых, землю  
Казанскую светом учения Христова  
утвердивший.

Да прославятся и вознесутся звезды пресветлыя,  
святители Христови, земли восточныя отечества  
нашего просветивший.

Да возвысится память пресветлых мучеников  
Христовых, преподобных и праведных, люди  
своя чудотвореньми наставляющих.

Слава, глас тойже:

Да радуется днесь Собор Святых, в земли  
Казанстей просиявших, да ликуют усердно  
Господу о нас молящийся, сии святии вей, иже  
именована быша, и сии, ихже имена у Господа  
сокровлена суть.

И ныне, Богородичен: Все упование мое на Тя  
возлагаю:

Славословие великое. И отпуст.

[Текст службы всем святым, в земле Казанской  
просиявшим, получен из Казанской епархии. Автор  
службы — **схимонахиня Игнатия (Пузик; 1903 –  
2004)**]